

MINISTERAN'I EDGAR

Ministeran'ny olana sy tsy mahavaha olana hoy ny depiote Todisoa

A nisan'ny nandray fitenenana tamin'ny fametraham-panontaniana tamin'ny governemanta teny amin'ny CCI Ivato afak'omaly, ny depiote Todisoa Andriamampandry avy amin'ny antoko TIM voafidy tao amin'ny Boriboritany faha-6. Nahitsy ny depiote Todisoa amin'ny tsy fahavitan'ny ministra sy ny governemanta ny asany.

Niantefa tamin'ny minisitry ny angôvo ny mikasika ny fahatapanan'ny jiro sy rano. Eo ihany koa ny vidin-tso-likika sy ny ho fiakarany. Aiza ny vola fanampiana mikasika ny jiro sy rano?

Tamin'ny minisitry ny fambolena sy ny fanajariana ny tany: mila fanatsarana ny vavarano eny Laniera sy Imamba. Mila hatsaraina ny fanarian-drano eny amin'ny lemak'i Betsimitatatra.

Ho an'ny minisitry ny filaminam-bahoaka: aiza ilay poste Avancé roa nampantenaina ny mponina Ambohimananina? Aiza ny mahakasika ny kidnapping toa tsy andrenesam-peo ianareo?

Tamin'ny ny minisitry ny varotra sy ny Indostria: minisiteran'ny olana no misy anao fa tsy misy fepetra raisina mihitsy? Ministeran'ny olana sy tsy mahavaha olana arak'izany ny ministeran'ny ministra Edgar Razafindravahy.

Ho an'ny minisitry ny fanabeazam-pirenena: mbola hakana vola ihany ve ny mpianatra manala fanadi-



Ny depiote Todisoa teny amin'ny CCI Ivato.

nana, ahoana ireo kolikoly maro toa tsy misy fanadihadiana mihitsy?

Ny lohany mihitsy koa no matsatso amin'ity governemanta Ntsay Christian ity, ka tokony hiala, maro ireo olam-bahoaka tsy voavahany.

Niaina

Raharaha Vazahabe sy ny mpanolotsaina

Amin'ny 19 jolay ny didim-pitsarana

Niakatra teny amin'ny fitsarana indray, afak'omaly ny mpanolotsainan'ny tanàna Clemence Raharinarina sy Lily Rafaralahy ary ireo mpanolotsaina namany TIM, noho ny fitorian'ny ben'ny tanàna Vazahabe sy ny CUA.

Nisy ny fanambarana nataon'ny mpanolotsaina Clemence tao aorian'izany. " MISAOTRA an'Andriamanitra lehibe fa vita indray ny fitsarana androany. MISAOTRA be dia be ireo mpanotrona ihany koa, ao anatin'izany ireo député TIM, ny jeune RMDM, ny mpanao politika samihafa, ny solontenan'ny syndicat SSM, ny mpanolotsaina namana,



Ireo mpanolotsaina sy ny mpanotrona azy, teny amin'ny fitsarana Anosy.

ny vondron'ny fikambanana, ny olon-tsootra, ny avy amin'ny FTAR, ny Vehivavy TIM Ary ny mpanao FB manohana sy mitrotro am-bavaka. Ny

akony: nahemotra fanintelon'ny amin'ny 12 jolay indray ilay raharaha mifandraika amin'ilay nisamborana ahy teny Ankorondrano, ka Antony avy amin'

ny mpitory hatrany ny fanemorana. Notsarina ilay raharaha nitorian'i Lalatiana Ravolomanana sy Balita anay. Mpanolotsaina 09 no niatrika ny mpitsara : 07 toriana - 02 mpitory. Nanitrikitrika ny mpitory fa nanaoka vaovao tsy marina sy nanalabaraka ary nanompa variraka azy ireo izahay. Izahay kosa anefa nandà hatramin'ny farany izany fiampangana izany ary miandry am-pitoniana ny didy amin'ny 19 jolay. " Nisolovava ireo mpanolotsaina notoriana tamin'ireo raharaha ireo, Me Eloi Ratefimahefamijoro.

Isambilo

Teratany Malagasy manana zom-pirenena hafa

Tsy azo ialana ny fikaonandoham-pirenena ho fampandrosoana

Tao aorian'ireo fangatahana maro natao teo anivon'ny Antenimierampirenena Frantsay, sy tamin'ny Filoha Emmanuel Macron amin'ny maha-filohan'ny Vondrona Eoropeanina azy, dia niaonanao dinik'asa niaraka tamin'ireo mpiandraikitra ambony eo anivon'ny departemanta : Directorate - General for International Partnerships sy ny European External Action Service, ny fikambanan'ireo Malagasy manana zom-pirenena hafa. Noresahina tamin'izany ny tohin' ilay fandalovan'ny iraka manokan'ny Vondrona Eoropeanina farany teo ary indrindra ny fikaonandoham-pirenena, izay tsy maintsy hatao, hahatongavana amin'ny demokrasia tena izy sy fampandrosoana ny firenena.



Ireo teratany Malagasy mizaka zom-pirenena hafa tany Bruxelles Belgique.

Marihina fa tafiditra ao anatin'ny ezaka efa natao tamin'ny taona lasa 2021 izany, ary fitohizan'ny amin'ireo fihaonana ataon'ny Collectif eo anivony ONU, na Firenena Mikambana sy ny Kongresy any Etazonia. Fifandrin'ny javatra ve, fa amin'izao fotoana izao

koa dia tonga ny masiovoho Amerikanina vaovao eto Madagasikara Claire Annette Pierangelo, rehefa tsy nisy nandritra ny taona maro. Araka ny vaovao voaray dia mahenika ny firenena maro ankoatran'ny any Eoropa, Amerika avaratra, Azia ity fikambanana

teratany Malagasy manana Zom-pirenena hafa ity. Fikambanana misahana ny fanabeazana ho olompirenena vanona, sy fikaonandoha ho amin'ny fampanjakana ny demokrasia sy ny tany tan-dalana.

Isambilo

Ny Valosoa sy fakafaka

Raharaha-pirenena Mpitondra manan-kambo no ilaina fa tsy matinkambo

Mailaka ery ny Filoha Rajoelina ankehitriny mitanisa ny hoe: "fitiavantandrazana sy ny hambompom-pirenena", kanefa dia ny mifanohitra amin'ireo voalaza ireo ny ataony, na tamin'ny fitondrana tetezamita na izao izy efa mpitondra "voafidy" izao.

Ny fitiavan-tanindrazana

Ny tanindrazana raha tsorina sy atao mahitsy ny filaza azy dia i Madagasikara no tanindrazana, ary isika vahoaka malagasy no tompon'io tanindrazana iombonana io, fa ny fitiavana azy indray dia tsy tokony ho sarotra ny famaritana azy, dia ny fanajariana azy hamokatra sy hitondra soa ho an'ireo vahoaka tompony. Ny mpitondra dia manana andraikitra amin'ny fampandrosoana ilay tanindrazana, sy fikarakarana ireo vahoaka tompon-tanindrazana.

Ho an'ny Tafika dia "Ho an'ny Tanindrazana" ny teny filamatra, "Tanindrazana sy Lalàna", ny an'ny Zandarimariam-pirenena ary "Tanindrazana sy Filaminana" ny an'ny Polisimpirenena, ny mampalahelo anefa nanomboka tamin'ny taona 2009 dia ireo mpanao fanamiana ireo, no nirotsaka nanampy an'Ingahy Filoha ankehitriny tamin'ny fakana fahefana tsy ara-dalana ary ankehitriny dia mbola ireo mpitondra mampijaly vahoaka ireo, no lasa tanindrazana tompon'ireo mpanao fanamiana sasany, ny vahoaka efa mijaly tsy manan-katokona mbola tsy voaaron'ireo mpitam-piadiana ny ainy sy ny fananany, fa ny sezan'ireo mpitondra no tsy maintsy atao laharampahamehana ny fiarovana azy, ireo mpitondra arovana fatratra indray, sady efa tsy mitsinjo ny tombontsoan'ireo vahoaka rahateo, no mbola mamoritra sy manao ramatahora amin'ireo izay sahy maneho hevitra.

Mazava izany fa mifanindran-dalana amin'ny famoretana vahoaka, ireo mpitondra sivily sy mpanao fanamiana, izay azo hambara avy hatrany fa fihetsika mifanohitra amin'ny fitiavan-tanindrazana izany.

Ny hambompom-pirenena

Misy ny toetra roa mifanohitra hamaritana ny fihetsehampo amin'ny hambo, dia ny manan-kambo sy ny matinkambo.

Manan-kambo no ilazana ireo sokajin'olona sahy mijoro amin'ny hevitra marina arovany, na koa mahavita mampiasa sy sainy sy ny herimpony handreseny ny sarotra, tsy azon'iza n'iza ahodina amin'ny rariny itompoiny ny olona manan-kambo, fa sahy miatrika hatramin'ny farany an'ireo mpandroba firenena ary vonona hijoro hatrany hiaro ny tombontsoam-bahoaka.

Fa ny matinkambo kosa dia olona dedaka, tia misehoseho kanefa dia manao fihetsika mambotry firenena, mampanantena ho mahavita izatsy sy izaroa kanefa dia vokatra poak'aty, aotra tanteraka e! sady tsy mety miaiky ny tsy fahombiazany, fa manilika hatrany ny tsy mety ataony amin'ny hafa na ireo nitondra teo alohany.

Feno 62 taona ny niverenan'ny fahaleovantena ary mitovy amin'izany koa ny nijoroan'ny Foloalindahy, kanefa indriny fa vao mainka miha-milentika ny firenentsika taorian'ny taona 2009, satria ireo mpitondra nifandimby taorian'ny nialan'ny Filoha Ravalomanana dia faly fotsiny manao tsianjery maimbo ny hoe: " fitiavan-tanindrazana sy hambompom-pirenena ", kanefa dia sady mandroba ilay tanindrazana, manao tsinontsinona ireo vahoaka tompon-tanindrazana ary indrindra dia tsy manana ny hambo iarovana sy fampandrosoana ilay firenena, fa dia izy ireo indray, no manao tantely afa-drakotra ny harempirenena tokony hositrahan'ny vahoaka malagasy rehetra, ny tena loza dia mbola matinkambo hatrany milaza fa mety hono ny ataony.

Ny vahoaka tsy bado akory fa mahalala ny ataony, satria fantatr'ireo vahoaka tsy miteny ireo, fa misy ny "Manan-kambo" azo antenaina hanavotra indray ny firenena ary misy dia misy tokoa ny "matinkambo" tsy manantsaina, afa tsy ny tombontsoan'izy mianakavy, ireny sokajin'olona ireny arak'izany, dia tsy maintsy ho fatin'ny hambony diso toerana.

Ny Valosoa